

Džennet – mjesto vječnog uživanja

Svi ljudi u ovomsvjetskom životu (ar. dunjaluk) danonoćno tragaju za svojom srećom. Svi žele da budu sretni i da u takvom stanju dugo ostanu. Gdje god da osjete miris sreće, na ta vrata smjelo pokucaju. Naposljetku, priznat će da su stanovnici surovog i prolaznog života gdje se neminovno smjenjuju različiti okusi slatkoće i gorčine. Uostalom, zar postoji negdje osoba koja konstantno uživa u nepomućenoj sreći i zadovoljstvu svoga dunjalučkog života?! Da li je nekad neko uspio procijediti radost od tuge, blagostanje od patnje, ljubav od mržnje, sreću od nesreće, i postao apsolutni sretnik?! Složit ćete se, dunjalučki život je isuviše jeftin, prevrtljiv i prolazan da bi se u njemu trajno uživalo! Njegova iskušenja nikada ne prestaju, a otrovne strelice nepresušnih ljudskih prohtjeva srce ne promašuju.

Naš Stvoritelj je objavio: **"Život na ovom svijetu nije ništa drugo do zabava i igra, a samo onaj svijet je pravi život, kad bi samo oni znali!"** (Kur'an: prijevod značenja El-Ankebut, 64)

U vječnosti postoji mjesto isključive sreće gdje se živi bez tuge, boli, gladi, bolesti... Tamo se živi ugodnim životom u ljubavi, gdje nema smrti, i gdje će neprestano uživati ljudsko tijelo i duša. Tamo je vječni život u sretnom ahiretskom domu koji nije san! Tamo je skupocjeni Džennet kome neumorno hrle pobožnjaci i dobri ljudi! Divna li je on nagrada i krasno li je boravište! U sljedećih nekoliko redaka pokušat ćemo, u duhu značenja kur'ansko-hadiskih tekstova, približiti i dočarati džennetske vječne ljepote.

Najniži stepen u Džennetu

Džennet se sastoji iz stepeni (ar. deredža) koji se po svom sadržaju razlikuju. Zavisno od čovjekovih ovomsvjetskih zasluga, odredit će se i njegovo konačno mjesto u

Džennetu. Najuzvišenija i najprivlačnija džennetska deredža naziva se *Firdevs*. Iznad nje je Arš, prijestolje Milostivog Gospodara, ispod kojeg izvire džennetske rijeke. Govoreći o najnižem stepenu u Džennetu, Allahov Poslanik, neka je na njega Allahov mir i blagoslov, rekao je: "Reći će Uzvišeni Allah čovjeku koji posljednji uđe u Džennet: *'Zaželi!'* Pa kada mu nestane želja, Uzvišeni Allah će mu kazati: *'Dobit ćeš sve što si tražio i još toliko deset puta.'* Nakon toga će ući u svoju kuću pa će mu prići njegove dvije supruge, hurije, i kazati: *'Hvala Allahu koji te je nama poživio i nas tebi podario.'* Pa će on kazati: *'Niko nije dobio veću nagradu od mene!'*" (Muslim) Ako je to najniži stepen u Džennetu, pa kako je tek onima koji su na najvišim stepenima Dženneta!?

Džennetske kapije

Kapija nekog objekta pravi se proporcionalno njegovoj veličini i potrebama. Malim objektima priliče male kapije, a velikim objektima velike kapije. 'Utbe ibn Gazvan, Allah neka je sa njim zadovoljan, rekao je: "...*Nama je, također, spomenuto da je širina džennetskih kapija razdaljina četrdeset godina putovanja, a doći će dan kada će biti preopterećene zbog gužve.*" (Muslim) Ako su džennetske kapije ovalike, koliki je tek Džennet!?

Treba znati da Džennet ima osam kapija različitih naziva sa kojih će vjernici biti dozivani: Kapija namaza, *Rejjan* – Kapija posta, Kapija sadake, Kapija hadždža, Kapija zikra (ili znanja), Kapija onih koji su se u srdžbi suzdržavali i

ljudima opraštali, Kapija džihada i Kapija onih koji su se istinski oslanjali na Allaha kroz koju će ući oni kojima nije sveden račun i koji nisu kažnjavani. Na svakoj kapiji stajat će meleki koji će vjernicima veselo iskazivati dobrodošlicu, nazivati im selam i srdačno čestitati na postignutom uspjehu.

Džennetske građevine

Džennet je stvoren od veličanstvenih materijala. Cigle su mu od zlata i srebra, učvršćene žbukom od miska. Njegova zemlja je od dragulja i rubina, a prašina od šafrana. U njemu će džennetlije raskošne dvorce imati, šatore od dragulja čija se vanjšina vidi iz unutrašnjosti, i unutrašnjost izvana, pa i odaje sve jedne iznad drugih sagrađene, ispred kojih su bašče kroz koje rijeke teku.

Džennetski plodovi

Uzvišeni je Svojim iskrenim robovima u Džennetu pripremio veličanstvene nagrade i uživanja koja nikada neće prestajati. Među takve nagrade spadaju i ukusni plodovi koji će neprestano postojati u prekrasnim baščama kroz koje će rijeke teći i koji će se džennetlijama sa grana nadohvat ruke spuštati. Džennetlije će uživati među lotosovim drvećem bez bodlji, i među bananama nanizanim, i u hladovini prostranoj, i pored vode tekuće, i usred voća svakovrsnog kojeg će uvijek imati i koje neće zabranjeno biti, i na posteljama uzdignutim... Hranit će se ukusnom hranom i pićem koje poželev. Zbog toga neće imati nikakvih neprijatnosti niti potrebu za obavljanjem nužde. Višak hrane i pića izbacivat će znojem koji će biti mirisa miska.

Džennetske rijeke

Za Svoje robove Uzvišeni Allah pripremio je u Džennetu čiste rijeke iz kojih će oni piti; rijeka od vode neustajale, rijeka od mlijeka nepromijenjena ukusa, rijeka od meda procijeđenog, i rijeka od vina koje gorko neće biti, niti će glava od njega boljeti i od kojeg se razum neće gubiti. Prijatno će biti onima koji ga piju. Ne pitaj o obalama ovih rijeka! Njihove obale su biseri gdje se nalaze posude kojih ima koliko i zvijezda na nebesima!

Stanovnici Dženneta

Kada Džennetlije uđu u Džennet, od njih će ružne misli, zloba i mržnja biti otklonjeni. Uživat će i nikada nesretni neće biti. Vječno će biti zdravi, jaki i besmrtni, kako njihovo tijelo, tako i njihove duše. Na njima će biti odijela od tanke i od teške zelene svile. Odjeća im vremenom neće gubiti svoju vrijednost i uvijek će biti lijepa i privlačna. Bit će okićeni narukvicama od srebra. Služit će ih vječno mlada posluga – ko ih vidi, pomislio bi da su biser prosuti. Džennetlije će vječno biti u najljepšim životnim godinama. U vječnoj kući sreće, stasiti, zgodni i u najljepšem izgledu, sreća muškaraca bit će upotpunjena kada se susretnu sa svojim ženama, hurijama – ljepoticama Dženneta. Svaki džennetlija imat će svoje dvije hurije, osim šehida koji će imati sedamdeset i dvije.

Hurije – džennetske ljepotice

Ne pitaj o detaljima kako izgleda džennetska hurija! Kada bi se ljepotica iz Dženneta – hurija pojavila na Zemlji, osvijetlila bi i mirisom ispunila sve između Zemlje i nebesa, a mahrama na njenoj glavi vrednija je od dunjaluka i svega što je na njemu. Zbog njih se konstantno priprema najskuplji vjenčani dar (ar. mehr), zbog njih se žustro nadmeću pobožnjaci žudeći da im ponude svoju

zaruku. A one, poput rubina i bisera, neopisivog izgleda, bez tjelesnih nedostataka, gledat će preda se i sa nestrpljenjem neodoljivo iščekivati susret sa svojim muškarcem koji im je obećan. Prije njih, niko ih nikada nije dodirnuo, ni čovjek, ni džinn! Nikada nisu, niti će ikada svoju čednost i nevinost moći izgubiti, i osim svojih muževa, ni za koga drugog neće se zanimati. Bit će stvorene da budu mile samo njima, godina istih, da uz njih neumorno i vječno u igrama veselja uživaju. A ukoliko ovosvjetska supruga bude džennetlija, stvaranjem u huriju, predivna izgleda i ispunjena ljubavlju, postat će kraljica svih ljepotica svoga muža!

Najveća nagrada u Džennetu

"Nakon što stanovnici Dženneta uđu u Džennet, Uzvišeni Allah će ih upitati: *'Hoćete li da vam dam još nešto više?'* Oni će odgovoriti: *'Zar nam nisi lica učinio svijetlim? Zar nas nisi uveo u Džennet i sačuvao od Vatre?'* Pa će se ukloniti zastor, i ništa draže neće im biti dato od gledanja u lice njihova Gospodara." (Muslim) Upitan: *"O Allahov Poslaniče, hoćemo li vidjeti našeg Gospodara na Sudnjem danu?"*, Allahov Poslanik, neka je na njega Allahov mir i blagoslov, odgovori: *"A da li vam šta smeta da vidite Mjesec kada je on pun?"* "Ne" – odgovoriše oni, pa im on reče: *"Isto tako ćete vidjeti svoga Gospodara."* (Buharija i Muslim)

Na kraju, neophodno je istaći da je ovo bio izuzetno oskudan opis Dženneta. U njemu postoji ono što oči nikad prije nisu vidjele, uši čule, i što razum nikada nije mogao ni pomisliti. To je skupocjeni Džennet kome neumorno hrle pobožnjaci i dobri ljudi! Divna li je on nagrada i krasno li je boravište! Pa, zar se za Džennet ne vrijedi potruditi?



DŽENNET
mjesto vječnog uživanja